

Nyovara Wao Manasyin Petrus Po Ratoe 1 PETRUS

Petrus po kove raura

¹ Risyirati Petrus, risyamo Yesus Kristus po inatutir indamu syo apa ayaowe raura. Syo nyovara waowe so ratoe more kawasaeyo Amisye po wasatayao wasai, wana no rui rui vayave no propinsi Pontus, Galatia, Kapadokia, Asia Mamaun, muno Bitinia. Weapamo watantuna no mine vone so maisyare vatano marane mansamaisy, weye wana no vatano wantatukambe Amisye aije awa yasyin. ² Injayo Amisye po wasatayao indamu weapamo Apa kawasae waino wasai, mamaisyo Apa bekere rai arono wusyinoe. Muno Apa Anawayo Vambunine mo wasaugavuje vatano wantatukambe Amisye aije umawe awa yasyine raora indamu weapamo kawasaeyo wasanuga ndandinit. Amisye beker indamu wabeta Yesus Kristus ai muno Apa mavu mo wapa ayao kakai rarandom no wasanuga rai inda ngkakavin.

Sya arakove, syare Amisye apa kove muno Apa saumane ntairi wasai.

*Wansanave Amisy amen wepi indati Po
wansaugav wansisa Apa muni kove rai*

³ Kangkamambe Amisye ai, opirati wama Amisy Yesus Kristus apa Aja pije! Amisye aemeno vatane wansai rave, weti Po kovo wanyine

raugaje wansai indamu wangkovo wanyimbe weye Yesus Kristus kovakato no wene ama uga rai. Omi mbewar wansanave Amisye amen no tawan. ⁴Wansanave Amen wepi indati Po apa kovo ngko dave raugaje wansai, wemirati Po ratayao vatan tenambe nanawirati Apa arikainye waino maije mai. Amisye apa kove somamo ngkungkume kakai, mbauge kakai muno ama ngkenave raumandi kakai, muno ntuna mo wansanyut no munijo ntiti. ⁵Weapirati Amisye po kove so ratayao wasai, pare Po raroron kakavimbe arono munije ama akari. Muno Po wasaeranande apa vambunine rai yava masyoto namije nde nande, weye wapanave Ai. Umba arono naije wasisa Apa muni kove rai.

⁶Maisyare omai ti, syare wasananibe! Weramu soamo wasanimaumbe masyote kavinta yai weye siurije kotare nande wasaija nene. ⁷Siurije nde wasai omamo indamu wapa anave raen dai: wapanave tugaive rako jewena rako? Wapa anave mamamo raurata irati emasije rai, wemirati wamo raugasya taname rai indamu wamo raen omamo emasi kakui rako jewena rako?* Weramu wapa anave ama kove mo emasije ama rakivan, weye emasije no tawane ramu. Weti ranivara wapa anave mamamo ntindimu, indati Amisye kangkamambe wasai, Po wasaura titive muno Po wasaijasea vombe arono Yesus Kristus pakare no

* **1:7** Vatane wo emasije rakani orame rai maisyare so: Wo orame raugasya raun no taname rai, arono mamamoan dave umba wame mampayar yara emasije ntonam (maisyare anane ntonam arono ranamae). Maisyare wemaisy, wamo emasi kakui raen dirive.

mine so. ⁸ Arono wusyinoe weapamo wapo Yesus Kristus aeno wasamije raije ramu, weramu wamuinyo Ai. Muno naisoamo wapo aeno wasamije rai tavone ramu, weramu wapanave Ai tugaive. Weti wasananibe rave, wapa wasananibe so ntiti rave ti vatane wo raura umamaisye ramu. ⁹ Wasananibe weye wapo wapa anave ama ine rajjar, omamo Amisye po wasapaya wapa ayao kakaije rai muno wasisa Apa muni kove rai.

¹⁰ Amisye apa kove umaso mammo anawae Amisye wo raurairive to arono wusyinoe ware, “Masyoto rijat indati Amisye po apa kove raugaje indamu wasapaya kakaije rai.” Weti anawae umaso wo ranyao mavabe indamu Amisye apa urairi wato ama tunato raije rakani. ¹¹ Yesus Kristus apa Anawayo Vambunine no no anawae umaso manuga rai Mo ana indati nande raro-rono mai wusyimbe, mare Kristus indati siuri umba kovo ntiti raunande Ai. Weti anawae umaso ubeker ware wo ama masyote rakani ware, “Anakotare so indati nandeare rui? Muno nandui rati nande?” ¹² Weramu Amisye po raro-rono anawae umaso mai pare anawae taune onawamo anakotare umaso nande mansai jewen, yara weapirati anakotare so nande wasai. Tugae, ayao anawae wo raura we mamaisyo ayao vatane wo ravovo wasai rai, omirati Ayao Kovo Kristus. Vatane wo Ayao Kove umaso ravovo wasai mamaisyo Anawayo Vambunine ama vambunine rai, Namirati no no munijo ntiti ti Amisye po ratutir nde. Wakoe! Amisye taune Apa naite ubeke dave indamu unanta anakotare so rai.

Anakotaro rui wapo rave, syare wasanuga

ndandinit maisyare muno Amisy e amaisy

¹³ Noare somai ti, wapanatatayaube ra wapa ana wapo ratantona nsarokir. Muno wasyisyaube inda vemo wapo ayao kakaije rave nora. Wasanuga ntenami wasanave Amisy e amen, wepi po kove raugaje wasai arono indati Yesus Kristus pakare mine so rai. ¹⁴ Wabeta Amisy ai, weye weapamo Apa arikainye waino wasai. Muno vemo watavono taune wapa bekero ngkakai wusyine rai nora, wemirati wapo rave arono wapantatukambe Amisy aijoe. ¹⁵ Vemo wapo ayao kakai rave nora, yara anakotaro rui wapo rave, syare wasanuga ndandinit maisyare muno Amisy e amaisy. Weye Opamo dandinit muno Wepi po wasawain indamu watavondi Ai. ¹⁶ Weye Ayao Amisy e mo ratoe mare, “Syare weapamo wadandinit, weye Risyamo dandinit.”✧

¹⁷ Weapo Amisy e awain wapare “Injae” arono wabe sambayambe Ai. Weramu syare wasaemen: Amisy e opirati po ayao mamaisy e rapatimugo vatan tenambe awa ana udave rai, weti syare wapo asyaniv! Opamo po vatane mansamaribe ramu, yara Po vatane awa mangke rapatimu mamaisy e awa ana udave rarijati. Weti kove mamu wabeta Ai tutir arono ta wana no mine vone so. ¹⁸⁻¹⁹ Syare wabeta Ai mavabe weye wapo raen animaisy e mirati Po raunande indamu Po wasapaya irati wapa ana wapo rave wusyinoe rai. Arono wusyinoe watavondi wapa ayao kopa rai, wemirati wapa aneno wusyine wo raugaje indamu wapo rarijat. Weramu watavondi raija marudi, weye mo kove raunande wasai jewen.

✧ **1:16** Imamat 11:44-45, 19:2

Amisye po taune apa Kavō aunande, weti Apa mavu wemi mo ravae indamu Po wasapaya wapa ayao kakai rai. Weti Po perakije muno emasije veano ravae jewan, omamo no tawane ramu. Yara Amisye apa ana po rave ravae omamo ama mangke nseo rave, omirati Yesus Kristus taune apa mavu. Apa mavu nsororop arono kakai, raurata irati maero domba tuvane aotar ameseo Amisy ai, Wepirati apa kakai inta no anasine rai jewan. ²⁰ Kristus sopamo arono mine so ranari rainyoe, Amisye po atayao wusyimbe to. Weramu munije ama akari mararaije so, de no mine so rai rati indamu aroron kakavimbe. Apa deye somamo indamu Po wasapaya wapa ayao kakaije rai. ²¹ Kristus wepi bewar ti wapanave Amisy ai, Napirati po Kristus aijaseo kovakato no wene ama uga rai muno Po kovo ntiti raunande Ai. Weti wapanave Amisy ai muno wasanaveano Amen tutir.

²² Sya arakove, syo raen wapo wasanuga ratayaowa ngkakavimbe to weye wabeta Amisye apa ayao tugae rai, muno wamuinyo wapa arakovo wanave Kristus aije mai tugaive. Weti vemo wasanuga rani muiny yara rani maradaive nora, yara wasanuga ntenami wamuinyo wasai vambinibe. ²³ Amisye po kovo wanyine raugaje wasai to weye wapanave Apa ayaowe rai, omirati ayao njayaisy noa pitawabe mijem. Muno wapa kovo wanyine somamo no no Amisy wepi noa nuge nunganui, yara no no vatano mine so nanawirati wene nde mai oma jewena.

²⁴ Maisyare Ayao Amisye mo raura mare:

“Vatane una no mine so nugoenta ramu,

raurata irati insumaije mavave mayon ramaisy,
 muno maisyare insumaije ama ugem ntaruran ti ama ngkenave raumandi.

Maisyare wemai tavon, vatane taune awa kove raumandi,

²⁵ yara Amisye apa ayaowe noa nuge nuganui.”[☆]

Amisye apa ayao namije omamo Ayao Kovo Yesus Kristus ravovo wasai to wem.

2

Yesus Kristus aurata irati oramo yavare rausea nteto raija matu

¹ Weti sya arakove, syare wapo anakotaro ngkakainoanive ramauta wasaora tenambe. Vemo wapayarurijabe nora muno wapa angkarije ntapekan nora. Vemo wasanuga mparijo vatano kaijinta mai nora muno wapo maura tantunawi nora. ² Yara syare wabekero Amisye apa kove rai, maisyare arikainyo tuvane beke dave po akoya ama ukame raisy wemaisy. Syare weapamo maisyare arikainyo tuvane umaso amaisy ti wabekero Ayao Amisye rai, omamo ndandinit, indamu watubai wabambunin muno wapa ayao kakai mpaya wasai ti wapo kove raijar. ³ Weye Amisye anuga ngkovo wasai omamo wapo ranaun dirive wasai to.

⁴ Wade Amisy Yesus Kristus ai, wepi kova no tawan. Opamo aurata irati oramo mantantumane rai: vatane wo orame umaso ramauta,

[☆] **1:25** Yesaya 40:6-8

weramu Amisye po rator pare ama ngkove manakoe, weti Po ratayao po apa yavare ranari.

⁵ Wade Ai indamu weapamo Apa oramo po veano apa yavaro ndandinit ranari tavon.* Muno Po wasatayao indamu wabe syembe wapanapatambe Ai, weti wapo wasanuga raunanto terave Ai, maisyare syene wo anakotare rameseo Amisy ai ramaisy.☆ Muno wapa ana wapo raunanto Amisy ai omamo Yesus Kristus po ratayao da mamai no Amisy amune rai. ⁶ Maisyare Ayao Amisy mo ratoe no wusyinoe rai, Amisy pare:

“Inya! Syo oramo ama ngkove ntiti inta ratayao to, Syo raugaje ntuna no munijo Yerusalem rai.

Wemirati oramo mbambunin indamu veano yavare ranari.

Orame so raurata irati Vatano syo atayao indamu are nawirati wanave Ai onawamo manimaumbe jeben, yara manayanambe Apa kove rai.”†

⁷ Weti vatano wapanave Kristus aije weapo raen Kristus pamo aurata oramo ngko dave umaso rai. Weramu vatano wanave jewene nanawamo, syare maemen Ayao Amisy ama aneme so rai mare:

“Orame somamo vatano wo yavare ranari wonayo rai, ti wo ramauta vayave.

Weramu omirati oramo manasyin dave Amisy po ratayao indamu yavare rausea nteto rai

* **2:5** Yavare so raurata irati Anugano Amisy mansai (Epesus 2:19-22). ☆ **2:5** Roma 12:1 † **2:6** Yesaya 28:16; Roma 9:33. Yerusalem mamoo vatano Yahudi awa munijo akoe mije, ama tame rawain tavonamo “Sion” weye ntami no Unato Sion rai.

mo raijar matuve.”✧

⁸ Muno syare vatano wanave jewene maemen Ayao Amisye ama anemo kaijinta rai no taiso:

“Orame somamo vatane awa kawi rantukamo rai ti utatayaje no min.”✧

Vatane umaso utatayaje weye wonae ubeta Amisye apa ayaowe raiji. Utatayaje mamaisyo mangke Amisye po rapatimugo mai wusyimbe to rai.

⁹ Weramu weapamo Amisye po rapatimugo wasai no taiso: weapamo susyo Po wasatayao to muno weapamo wabe syembe Akarijo Titi ai. Muno weapamo kawasaeyo wadandinit muno weapamo vatano Amisye apaura terave wasai. Amisye po wasatayao indamu wapo Apa ana po rave manakoe ravov. Weye Opirati po wasawain wapuje no kaumure raora indamu wasisa Apa varo ngkove rai.✧

¹⁰ “Wusyinoe weapamo Amisye apa kawasae waino wasai jewen,
weramu soamo weapamo Apa kawasae waino wasai.

Wusyinoe Amisye aemeno wasai ramu,

weramu soamo aemeno wasai rave.”✧

¹¹ Sya arakovo inanuga no wasai, wasaurata irati vatano marane mai arono watantuna no mine vone so, weye wapa munijo tugae nori rati munijo ntiti. Weti syo ananyao raugaje wasai indamu vemo watavondi wasanasine ama bekero ngkakai mine so rai jinya, wemirati mbe

✧ **2:7** Mazmur 118:22; Matius 21:42; Markus 12:10; Lukas 20:17; Arakov 4:11 ✧ **2:8** Yesaya 8:14; Roma 9:33 ✧ **2:9** Yesaya 9:2; Epesus 5:8; Kolose 1:12-13; 1 Tesalonika 5:4-5; 1 Yohanes 2:8-11

✧ **2:10** Hosea 2:23

marovave taune wasai. ¹² Wana no vatano wantatukambe Amisye aije awa yasyin. Onawamo wo wasaura tantunawi ware weapamo vatano wakakainoanive. Weti syare wapa ana wadav-eye ngko tenambe indamu arono vatane wato wo raen, wea indati wo Amisye ararimbe arono Apa masyoto de mansai no mine so rai.

Wabeta pemerinta ai muno wabeaje vatan tenambe mansai

¹³ Wabeta vatan tenambe nanawirati ube akarive no mine so mansai, weye wemirati Amisy Yesus Kristus apa bekere mije. Weti wabeta akarijo titi ai, napi be akarive pemerinta rai. ¹⁴ Muno wabeta akarijo pemerinta mansai tutudi, weye onawamo akarijo titi pemerinta umaso po matutir indamu wo apa bekere rajar, weti wo mangke raugaje vatano nanawirati awa ana udave mamune mansai, yara ukangkamambe vatano nanawirati awa ana wo rave ngkove mansai. ✧ ¹⁵ Weye Amisye beker indamu wapa ana wapo rave ngkove mo vatano wantatukambe mauga ti awa wo wasaura tantunawi nsopi indamu umanin kobe. ¹⁶ Weramu vemo wapo ratantonanare somaisy inya: “Ranivara wambeker wamo anakotaro ngkakai rave, weamo wamo rave kai, weye vatan inta wo wansaorai kakai.” Wakoe! Ayao wato ngkove ramu! Weapamo vatano Amisye po wasaijar indamu wapanapatambe Ai, weti wabeta ana ngkove bo rai. ¹⁷ Wabeaje vatan tenambe mansai. Wamuinyo wapa arakovo wapanave Yesus

✧ **2:14** Roma 13:3-4

Kristus ai kava wasai vambinibe. Wapo Amisyey asyaniv. Wabeaje wama akarijo titi pemerinta ai.

Kristus apa siurije mbe unanuive wasai

¹⁸ Syo ananyao raugaje vatano weapirati wapapatambe akari inta aije wasai no taiso: Syare wabeta wapa akari apa ayao rai tenambe. Syare wabeaje ai arono apa ayao nsaumano wasai muno arono apa ayao mpanyoano wasai tavon. ¹⁹ Ranivara wapo ana ngkakai inta rave ramu, weramu wapa akari po wasave tatu-gadi vayave, weamo syare wasatawandi rai weye wasaemendi Amisyey apa bekere rai. Weaveti Amisyey anayanambe wasai. ²⁰ Weramu ranivara wapa akari po wasanepat weye wapo ana ngkakai rave, indati syare wapo wapa siurije umaso ranawan kai. Weramu ranivara wasiuri weye wapo ana ngkove rave, muno wasatawandi wapa siurije rai kobe, weamo Amisyey anayanambe wasai. ²¹ Amisyey po wasawain indamu wasiuri, weye Kristus siuri wasamarom weti be unanuive inda wapo arijat.

²² “Opamo po ayao kakai inta rave jeben,

Muno ayao arurijate inta no Ai jeben tavon.”✧

²³ Arono vatane wo Kristus akaajian, Opamo sari-rae akananto Po makaajiane ramu. Arono siuri weye vatane wo ansewabe, sakina damu Po anaamatane inta rapatimugo mansai ramu. Yara Po taune aunanto Amisyey obo ai, Opi po mangke rapatimu mamai dave. ²⁴ Kristus taune po wama ayao kakai ranawan arono sawa no inyo kapite rai, indamu wamo ayao kakai ravea nsopi umba

✧ 2:22 Yesaya 53:9

wantavondi ana ngkove obo rai tutir. Weye Kristus apa paro no anasine rai wemirati mo saumane raugavo wansai. ²⁵ Wusyinoe weapamo wasaurata irati maero domba po unanuije rapaya ti to pananepabe amaisy. Weramu naiso wasakinav wapakare Vatano po Domba Maeranande ai to, Napi po wasaeranande muno Po wasavijuri jirati kakaije rai.

3

Ananyao raugaje anya, wanya ubauname mai

¹ Syo raura tavon irati wanya wabauname wasai: wabeto wapa anya mansai tutudi.✧ Wabeto mai indamu ranivara wapa anya inta wanave Ayao Kovo Kristus rai rainy, wea indati wo wapa ana wadave ngkove raen ti mo manuga raugabe indamu wanave kobe. Maisyare omaisy, wapa anya so wanave mammo wapo mansanyao wasawa rai ma jewen kai. ² Arono wo wasaen wapo Amisy asyaniv muno wapa ana wadave mammo ngko dave, indati mo manuga raugabe indamu wanave Ai. ³ Sya arakovo wanya weap, vemo wapo wasanakea ramarandine obo ratantona nora.✧ Weye wapa ngko dave mammo raen no wasanakea vone rai jewen, maisyare wasakarivui nye rairi ti ngko dave ndako, wapo raonijo emasije rangkion ndako, wapo ansuno ngko dave rave rako omaisya. ⁴ Yara wapa ngko dave mammo ntipu no wasanuga rai umba nandesen. Weti syare wasanuga mammo mpaaje muno nsaumano vatane mai, weye wapa ngko

✧ **3:1** Epesus 5:22; Kolose 3:18 ✧ **3:3** 1 Timotius 2:9

dave namije no tawan, muno wemirati Amisye po rator pare ngkove mije. ⁵ Muno arono wusyinoe, wanya nanawirati utavondi Amisy ai muno mansanave Amen wenawamo maisyare wemai tavon. Onawamo awa ana ngko dave raen no awa ubeaje awa anya mansai. ⁶ Maisyare wamo raeno aneno Sara rai, wemi mbeto ama anya Abraham ai muno mo awain ama akari. Sya arakove weap, Sara mbe unanuive wasai, weti ranivara wapa ana wapo rave ngkov muno wapo ayao panyoane inta rasyanive ramu, weamo weapamo Sara ama arikainye waino wasai.

⁷ Naiso syo raura tavon irati anya wabauname wasai: Syare weananto wapa wanya manuga rai tenambe, weye wadaen wanya mamu ranasine ama vambunine mamaisyo anya apa rai jewen. Muno wabekobeo mai inda mamaisyo, weye onawamo Amisye po apa kovo ngko dave raugaje mai tavon, maisyare muno Po raugaje wasai. Weramu ranivara wabekobeo wapa wanya maije jewen, weamo mo wapa sambaya wapo raura seo Amisye aije ransopi.

Wapo ana ngkove rave tutir

⁸ Ananyao ranugan tenambe mi som: Arakove, syare wapa ana wapo ratantona intabo muno wasanuga intabo ti wasaumano wasai vambinibe. Wasaemeno wasai vambinibe maisyare arakovo anui, rijate inta maemeno mansai vambinibe no awa yavaruga rai ramaisyo. Syare wasanuga ngkovo vatane mai muno wasanuga mpaaje mai tavon. ⁹ Arono vatane manuga mamuno wasai, vemo wapo mamune

rasakinavo mai nora. Arono wo wasakaajian, vemo wapo akaajiane rator akaje mai nora. Yara wapo kove rasakinavo mansai. Weye Amisye po wasawain indamu wapo kove raugaje mai, indati Po kove raugaje wasai tavon. ¹⁰ Ayao Amisye mo ratoe mi som:

“Are pirati beker pare anayanambe arono tuna no mine so,
 muno pare apa masyoto no no mine so ama kove raen no ai,
 weamo syare po taune awa raeranande indamu vemo po ana ngkakai inta raura nora,
 muno po aarurijate inta rator nora.

¹¹ Syare akirive ana ngkakai rai,
 yara po ana ngkove rave tutir.

Muno syare bekero panyoambe indamu anuga nsaumano vatan tenambe mansai.

¹² Weye Amisye po vatano wo ana mamaisye rave mansaeranande,
 muno Po awa sambaya wo raura seo Aije raraniv.

Weramu Amisye marovave vatano nanawirati wo ana ngkakai rave mai.”☆

Ranivara wasiuri weye wapo ana ngkove rave, weamo wasatawandi rai

¹³ Ranivara wabeke dave indamu wapo ana ngkove rave, indati vatan inta wo wasave tatu-gadi jewen. ¹⁴ Weramu ranivara siurije nande wasai weye wapo ana ngkove rave, indati Amisye po kove raugaje wasai. Weti vemo wajanivo vatano wo wasave tatugadi mai nora muno vemo

☆ **3:12** Mazmur 34:12-16

wasanuga mamaun nora![☆] ¹⁵ Yara wabeaje Kristus ai muno wapo aura kakavimbe wapare Opirati wapa Amisye pije. Arono vatane wo wasanajo ware, “Wabeanimaibe wasanave Kristus amen?” syare wapanatatayaube indamu wapo ayaowe rasakinavo mai. ¹⁶ Muno syare wasanuga mpaaje muno wapayao saumambe arono wapo Kristus aura kakavimbe mai. Ranivara vatane wo wapa ana wadave ngkove raura tantunawi weye watawondi Kristus ai, vemo ayao kakainoanive inta ntipu wasai nora, yara syare wasanuga ndandinit tutir. Indati masyoto makareye vatane wato usamane wo wasaura tantunawi umaso rai.

¹⁷ Ranivara Amisye beker pare wasiuri, kove mamu wasiuri weye wapa ana wadave ngkov, yara vemo wapa ana wadave ngkakai omi mbe-war wasiuri wenora. ¹⁸ Kristus siuri tavon ti kakai to. Opamo kakai intabo kobe indamu Po wansapaya wama ayao kakaije rai. Opirati ayao kakai meweno Ai, weramu kakaijo vatano wama ayao kakai ntapekane wansai, indamu Po wansaugav wanta Amisy ai. Vatane wo Kristus anasine raubaisy, weramu Anawayo Vambunine mo kovakato raunande Ai. ¹⁹ Muno Anawayo Vambunine no Kristus ai, weti poroto Po ayao Amisye ravovo mansanawayo nanawirati utan-tuna makova mansai.* ²⁰ Onawamo ubeta Amisye

[☆] **3:14** Yesaya 8:12-13 * **3:19** Mansanawayoe so are nawije? Ayao so ama ntunato raije mbare jewen, weti vatane inta wo ratantona ware mansanawayo umaso onawamo vatano ukakai ti mansanawayo karimu arono Noaka aijoe, yara vatano kaijinta wo ratantona ware onawamo naito Amisy nanawirati wo ayao kakai rave (Kejadian 6:1-4; 2 Petrus 2:4; Yudas 1:6).

ai jewen arono aneno Noaka noowe. Amisye apa bekere mamu indamu usakinavo awa ayao kakaije rai, weti atawandi Po manyut awa Noaka po apa nyomane ranarija mewen. Weramu watano usea nyomane umaso rai obo nawirati mapaya irati mangkeo manayam akoe ama kakai mo raugave rai; watane umaso mansano kaudandei bayave. ²¹ Wemirati rapararita irati rijate soamo wansaugasya kuvuni mana rai, omamo mo wansapaya ayao kakai rai. Koano wansaugasya kuvuni mana rai omamo indamu mo wansanasino nggwambe rarondome oma jewen, yara wamo Amisye anajo indamu po wama ayao kakai wansanuga rarandom inda ngkakavin. Amisye po wansapaya wama ayao kakaije rai weye Kristus kovakato no wene amauga rai. ²² Muno Kristus seo no munijo ntiti rai to, soamo tuna no Injajo Amisye anem ngkove rai indamu be akarive atavon. Opamo be akarive naito Amisye mansai, be akarive irati akarijo titi wo naumo warae raijanande mansai, muno be akarive tavon irati vambunine kotaro rui una no naumo warae mansai tenambe.

4

Soamo watavondi ayao kakainoanive rai jakatote ramu weye weapamo watano wagwanyin to

¹ Arono Kristus de mine so rai to, Opamo anasine nsiuri, weti syare wapa bekere mamaisyo Apa rai. Wapanatatayaube wasiuri weye watavondi Kristus ai, ti wapo ayao kakai rawatambe wasai. ² Weti sya arakove, arono ta wana no mine vone so rai, vemo watavondi

vatane awa bekero ngkakainoanive rai nora, yara watawondi Amisye apa bekere obo rai. ³ Nugoenta rave wapa ana wapo rave mo watano wantatukambe Amisy ai awa ramaisy. Weye arono wusyinoe wapo ayao anaerere rave muno watawondi wapa bekero ngkakai rai. Muno weamaeno awije rai, wapanugan wapo awije ramanam ti wapaumandi. Muno wabe sambayambe yare rai ti nggwambe wasai. ⁴ Wapa arakovo wusyine upaparo mansai weye soamo watawondi mai jakatoe ramu arono wo awa ana udave nggwambe rave. Weti wo wasaura tantunawi. ⁵ Weramu masyoto rijat watano nanawije indati usayai no Amisye amun, wepirati panatatayaube indamu Po vatan tenambe mansanajo awa ana udave rai, watano nanawirati utantunana nene muno nanawirati ugwenen to, indamu Po ayao mamaisye rapatimugo mai. ⁶ Wemi mbewar Ayao Kove mammo ravovo watano ugwenen to mansai tavon. Onawamo ukakai weye wene mammo Amisye apa mangke po raugaje vatan tenambe mansai. Weramu Ayao Kove ravovo mai wusyimbe to indamu mansanawayoe ukova nuge nuganui, mamaisyo Amisye apa bekere rai.

Kovo vambunino Amisye po raugaje mammo wapo raija kobe indamu ngkovo watano wanui mansai

⁷ Munije ama akari nandea mararai to. Weti wasyisyaube muno wapo wapa ana wadave, wadatantona raeranande indamu varore ntami wasai wapo sambaya rave Amisye ai. ⁸ Ana mbe mobe mammo weamuinyo wasai vambinibe,

wasanuga ntenami rautan. Weye ranivara weamuinyo wapa arakove mai, weamo awa ayao kakai manui wo rave irati wasai mamu wapo ratore ramu, yara wasatawandi rai vayave.✧ ⁹ Syare wapo wapa arakovo wanave maugave usen no wapa yavar, muno wapo rajaro wasanuga ranayanambe rautan, weramu vemo wapanatambe nora.

¹⁰ Amisye po kovo vambunine raugaje wansai tutudi, muno Apa kovo po raugaje mbe kotabe. Weti syare vatane nanentabo nyo nya kovo Amisye po raugaje nai rajia kobe rave indamu ngkov irati vatano wanui mansai. ¹¹ Ranivara Amisye po kovo vambunine raugaje nai indamu nyayao papirabe, weamo winyirati nyo Amisye apa ayao raura anugano Amisye mansai. Ranivara nya kovo vambunine mamu nyo vatane maeranande, weamo nyo maeranande mamaisyo Amisye apa vambunino po raugaje nai rai. Indamu nde anakotaro rui vayave wapo rajar, wapo Amisye aura titive irati Apa Kavoyesus Kristus apa tame rai; Apa kovo ntiti muno Apa vambunine rararimbea nuge nuganui! Amin.

Ranivara wapa anave Kristus aije mbewar ti siurije nande wasai, weamo wasanave Amisye obo amen

¹² Sya arakovo inanuga no wasai, soamo siurijo manakoe nande wasai indamu mo wasatopan, weramu vemo wapaparo wasai nora. Weye siurije nande vatano wamanave Kristus aije wansai tenambe indamu wama anave ama vambunine raen. ¹³ Yara syare wasananibe weye

✧ 4:8 Amsal 10:12

varore raugaje wasai indamu watawondi wasiuri Kristus atavon. Indamu arono Kristus pakare no mine vone so Apa kovo ntiti rautan, indati wasanayanambe. ¹⁴ Ranivara watawondi Kristus ai mbewaramo vatane wo wasaura tantunawi, kove ngkov irati wasai. Weye maisyare omaisyamo tugae, Amisye apa Anawayo Vambunin, omi ntiti rave, no wasaija. ¹⁵ Weramu vemo wapa ana wadave ngkakai wemi mbewar ti wasiuri rai jinta! Ranivara vatane inta siuri weye po vatane inta aubai dako, panaonoambe rako, apa ana dave mamun dako, po taname raon nanto vatano kaijinta awa ayaowe rai rako, weamo vatano napije siuri kai! ¹⁶ Weramu ranivara wasiuri weye weapamo vatano Kristen nawirati weap, weamo vemo weasamane nora. Yara syare wapo kove raura seo Amisye ai weye weapamo Kristus apa tame veano wasawain.

¹⁷ Soamo ama masyote nande to, Amisye po vatane mansanajo awa ana udave ngkakai, ngkove rai. Muno kawasaeyo Amisye apaura mansai wenawirati Po manajo manasyimbe. Wakoe! Ranivara Amisye po usye ko irati vatano wamanave wansai, umba tugae rave vatano wanave Apa Ayao Kove rajje jewene nawamo indati awa mangke raugaje mangkebe mai! ¹⁸ Maisyare Ayao Amisye mo raura mare:

“Vatano wanave muno manuga ngkov onawamo
 usiuri rati umba maugav usisa munijo ntiti
 rai.

Yara vatano wo ayao kakai rave muno
 vatano manuga mamuno Amisy ai nawamo

indati unajivo Amisye apa mangke raora kakai!”☆

¹⁹ Weti ranivara weasiuri mamaisyo Amisye apa bekere rai, weamo syare wasatawandi. Syare wapo taune wasaunanto Amisyo wepi po wasanarije Ai. Muno wasanave Obo amen weye Opamo teto apa urairi rai tawan. Weti syare wapo ana ngkove rave tutir.

5

Ananyao raugaje anugano Amisye mansai muno awa akari mansai

¹ Syare syo ayao inta raura akarijo wapo anugano Amisye maugave wasai. Risyamo akarije inta pi ri tavon, muno risyamo syo Kristus apa siuri raeno inamije rai to. Muno arono indati Kristus pakare akato ti Apa kovo ntiti rarorono vatane mansamun, indati risyamo ritavondi Apa kovo ntiti wato rai. ² Syo ananyao raugaje arakovo wabe akarive wasai no taiso: Amisye po apa kawasae inta mansaunande indamu wapo maugav. Wemirati Apa anakero po raugaje wasai mije, weti syare wapo maeranande kobe, maisyare vatano po apa domba maeranande amaisy.☆ Vemo wapo anakere so raijar maisyare vatane inta po wasantitidi wemaï nora, yara wapo raijaro wasanuga ranayanambe rautan, mamaisyo Amisye apa bekere rai. Muno vemo wapo raijar weye wabekero doiye obo rai nora, yara wapo raijar weye wabeke dave indamu wapo Amisye apa kawasae maeranande. ³ Vemo

☆ **4:18** Amsal 11:31 ☆ **5:2** Yohanes 21:15-17

wabe akarive tanamamoambe vatano nanawirati Amisye po mansaunande wasaije mai nora, yara ribeker indamu wabe unanuive mai indamu wo wapa ana wadave rarijat. ⁴ Weti indati wapo wapa anakere umaso ama ine raugav arono wapa Akarijo Titi pakare no mine so. Umba naije Po wapa anakere ama ine raunande, wemirati ama ngkovo ntiti raumandi kakai, yara noa nuge nuganui.*

⁵ Syo raura tavon irati arakovo kamurame wasai indamu wabeaje irati akarijo wo anugano Amisye maugave mansai. Muno vatan tenambe weapamo, vemo wasararin nora yara syare wasanuga mpaaje irati wapa arakove mansai tutudi, weye

“Amisye kantetoaro vatano mararine mansai,
yara Po kove raugaje irati vatano manuga
mpaaje mansai.”[☆]

⁶ Maisyare omai ti, syare wasanuga mpaaje no Amisye amun, opirati bambunin dave, indamu arono Apa masyote mamaisy, indati Po wasaijasea titive. ⁷ Anakotaro wasanuga mamaun dai mamu wapo raunanto vintabo no Amisy ai indamu Po wasaeranande rai, weye Opamo aemeno wasai.

⁸ Wasyisyaube muno wapanatatayaube ra wamamai to! Weye Anakakai Akoe pamo wapa marova pije. Wepirati aurata irati make singa karirimbe inta ai, wepi toe de po apa maero po

* **5:4** Ayao Yunani naiso mo raura mare wama anakere ama ine raurata irati “sapeo ngkenav inta rai, omirati ama ngkenave raumandi kakai yara noa pitawabe.” [☆] **5:5** Amsal 3:34; Yakobus 4:6

maisye makani. ⁹Weti syare wapo Anakakai Akoe aorai, wana tawan no wapa anave rai. Weye wapo raenamo weabopirati siurije so nande wasaije ramu, yara wapa arakovo wanave Kristus ai utantuna no munije rui vayave no mine so usiuri tavon mamaisyo wapa rai. ¹⁰Weramu wapa siuri so noa nugoenta ramu, yara kavinta nakato nsopi. Mewen to, umba Amisye po wapa ana no wasai ravera mamai tenambe: Po wasanuga rajjasea mbambunin, Po vambunine raunande indamu wapa anave ntindimu, muno wana tawan no Ai matuve. Weye opamo Amisyo anuga ngko dave, Po wasawainde indamu watavondi Apa kovo ntiti no pitawabe rai, namirati Po raude wasai weye wabe intabove Kristus ai. ¹¹Kangkamambe Amisy ai, wepirati apa vambunine ntamija nuge nuganui. Amin!

Kovo Petrus po raura marane rai

¹²Sya nyovara wao ntumainyo idatoe somamo arakovo Silas† tavondi sya anakero syo ratoe rai. Silas so syo aen opamo wama arakovo tavondi Kristus ai tutir. Syo ratoe wasai indamu syo wasanuga rajjasea mbambunin muno indamu syo Amisye apa muinye raura tugaive wasai. Weti vemo wasakirive Apa muinye so rai nora, yara wano tawan no rai. ¹³Arakovo anugano Amisy una no munijo Babilon naiso‡ wo kove ranutugore wasai. Onawamo Amisye apa kawasaeyo po

† **5:12** Silas awain tavonamo Silvanus. ‡ **5:13** Arono wusyinoe Petrus po apa nyovara waowe so ratoe, vatano Kristen wanui wo tamo Babilon veano munijo Roma rawain. Babilon rawain tavonamo Babel.

mansatayao maisyare muno weasamaisy. Muno Markus po kove ranutugo wasai tavon, wepirati maisyare taune sya arikainyo inanuga no ai pije. ¹⁴ Wapo kove raura wasai vambinibe wasanuga muinye rautan, weye wabe arakobe no Yesus Kristus ai.

Syare Amisye apa saumane no wasautan tenambe, wepirati Kristus apa kawasae apaura wasai.

*Risy,
Petrus*

Ayao amisy urairi wanyin
New Testament in Yawa (ID:yva:Yawa)
Perjanjian Baru di Yawa

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files
dated 29 Jan 2022

f32aa90e-2509-5f04-a3ab-17abf547cfde